



Sud Bosne i Hercegovine
Суд Босне и Херцеговине

Broj: S1 3 Iž 044141 22 Iž
Sarajevo, 19.10.2022. godine

Sud Bosne i Hercegovine u Sarajevu, u apelacionom vijeću sastavljenom od sudija Zvezdane Antonović, predsjednika vijeća, Mirsade Džindo i Redžiba Begića, članova vijeća, odlučujući o žalbi političke stranke Naša stranka, sa sjedištem u Sarajevu, ul. Branilaca Sarajeva 5/1, koju zastupa generalni sekretar Nihad Uk, izjavljenoj protiv odluke Centralne izborne komisije Bosne i Hercegovine broj: 05-1-07-5-4443/22 od 11.10.2022. godine, o utvrđenoj odogovrnosti i novčanom kažnjavanju za kršenje odredbi Izbornog zakona BiH, na nejavnoj sjednici održanoj dan, 19.10.2022. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine broj i datum navedeni u uvodu, utvrđeno je da je:

(1) Politička stranka Naša stranka odovorna što je kandidat ove političke stranke Amel Lizde dana 01.10.2022. godine na svom Facebook profilu vodio izbornu kampanju u vrijeme trajanja izborne šutnje, čime je prekršio pravila ponašanja u periodu koji počinje 24 sata prije otvaranja biračkih mjesta i traje do njihovog zatvaranja iz člana 7.4 stav (1) tačka 3) Izbornog zakona BiH, pa joj se zbog toga izriče novčana kazna u iznosu od 3.000,00 KM.

(2) Utvrđuje se da je Amel Lizde kandidat ispred političke stranke Naša stranka odgovoran što je dana 01.10.2022. godine na svom Facebook profilu vodio izbornu kampanju u vrijeme trajanja izborne šutnje, čime je prekršio pravila ponašanja u periodu koji počinje 24 sata prije otvaranja biračkih mjesta i traje do njihovog zatvaranja iz člana 7.4 stav (1) tačka 3) Izbornog zakona BiH, pa mu se zbog toga izriče novčana kazna u iznosu od 3.000,00 KM.

Protiv ove odluke politička stranka Naša stranka blagovremeno je uložila žalbu u kojoj je navela da je Centralna izborna komisija odlučila zbog formalnog nedostataka podnesak političke stranke SDA cijeniti kao inicijativu i da se predmetni slučaj odnosi na član 6.2 stav (3) Izbornog zakona BiH kojeg između ostalog citira. Navodi, da je analizom podneska i pripadajuće slike ekrana jasno da se formalni nedostatak odnosi na nenavodjenje vremena objavljivanja sporne Facebook objave, koje je krucijalno u smislu određivanja odgovornosti političke stranke i njenog kandidata za kršenje člana 7.4 stav (1) tačka 3) Izbornog zakona BiH. Od Suda traži da pobijanu Odluku poništi, te vrati predmet na ponovni postupak.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu.

Žalba je neosnovana.

Prema stanju u spisu Centralna izborna komisija Bosne i Hercegovine je dana 01.10.2022. godine zaprimila podnesak političke stranke Stranka demokratske akcije-SDA, Gradski odbor Mostar, koji se odnosi na kršenje odredbe člana 7.4 stav (1) tačka 3) Izbornog zakona Bosne i Hercegovine. U kojem je navedeno da je Amel Lizde, kandidat ispred političke stranke Naša stranka, objavio na svom Facebook profilu sadržaj kojim se na direktan način krši pravila izborne šutnje. U prilogu dostavlja screenshot i link o navedenom.

Centralna izborna komisija Bosne i Hercegovine je, imajući u vidu odredbu člana 6.2 Izbornog zakona Bosne i Hercegovine, u postupku ispitivanja formalno pravne strane podneska utvrdila da je isti dopušten, ali da isti sadrži formalne nedostatke iz kojih razloga je u smislu člana 6.2 stav (2) i (3) Izbornog zakona Bosne i Hercegovine predmetni podnesak cijenila kao inicijativu za pokretanje postupka i postupak vodila po službenoj dužnosti.

Postupajući po navedenoj inicijativi. Centralna izborna komisija Bosne i Hercegovine je nakon prijema, u skladu sa zakonskom procedurom, aktom broj: 05-1-07-5-1976-2/22 od 03.10.2022. godine inicijativu dostavila političkoj stranci Naša stranka na izjašnjenje u roku od 24 h od prijema obavijesti, a posebno da se izjasni kandidat Amel Lizde.

Politička stranka Naša stranka je dostavila izjašnjenje u kojem navodi da odbacuju navode iz prijave. Ističu, da se sporni status nalazio na privatnom profilu g. Amela Lizde, koji je bio otvoren samo za njegove prijatelje i koji je brzo nakon objave i uklonjen.

Kandidat Amel Lizde u svom izjašnjenju navodi daje spornu objavu objavio u petak 30.09.2022. godine na svom privatnom Facebook profilu. Navodi, daje poruka bila namjenjena za njegove prijatelje da glasaju, ali je greškom ostala na opciji javno, te da iz razloga što je rađen edit poruke je i vrijeme poruke izmjenjeno. Ističe, da je objavu stavio na opciju privatno (samo za prijatelje), da oglas nije bio sponzorisan. da se objavom obratio kao građanin, te daje objavu na dan izbora uklonio i da ista nije

bila dostupna.

Iz stanja spisa proizilazi da je CIK BiH, nakon izvršenog uvida u spis predmeta i dostavljeni screenshot objave sa društvene mreže Facebook utvrdila da je politička stranka Naša stranka odgovorna jer je Amel Lizde kandidat ove političke stranke na Općim izborima 2022, godine, dana 01.10.2022. godine na svom Facebook profilu vodio izbornu kampanju u vrijeme trajanja izborne šutnje, odnosno u vrijeme kada je zabranjeno vođenje izborne kampanje i javno oglašavanje, čime je prekršio pravila ponašanja u periodu koji počinje 24 sata prije otvaranja biračkih mjesta i traje do njihovog zatvaranja.

Ovakvo utvrđenje CIK BiH je i po ocjeni Apelacionog vijeća pravilno, jer iz dostavljenog dokaza odnosno screenshot slike je jasno utvrđena činjenica da se radi o objavi na Facebook profilu Amela Lizde kandidata političke stranke Naša stranka objavljenoj u vrijeme trajanja izborne šutnje, jer je objavljen sadržaj teksta koji glasi: „Dragi prijatelji, prije svega, želim da se zahvalim za sve poruke podrške koje sam primio ovih dana, ali i za dobonamjerne kritike i sugestije, kao i ideje koje ste podijelili sa mnom. Moram priznati da odavno nismo imali bučniju kampanju. Pokazivali su silu i zastrašivali zastavama, sirenama, ratnim pričama i autobusima dok su se ovi kreativniji među nama oglašavali i vezanjem bidona za branik kao što možete vidjeti na slici. U svemu tome, nastojao sam biti konstruktivan i pozitivan, držao sam se svog puta, bavio se prvenstveno komuniciranjem svoje vizije i slušanjem onoga što se mi vi imali za reći. Prepješačio sam Mostar uzduž i poprijeko, ali i obišao sve općine u kantonu i jedna je stvar sigurna: Adnana sa Tekije i Dragana sa Strelčevine kao i poljoprivrednika iz Jablanice i onog iz Čapljine. Svi oni, tj. svi mi želimo raditi i dostojanstveno živjeti od svog rada, u svojoj zemlji, sa svojim ljudima. Upravo iz tog razloga, najviše sam se trudio pronaći i ponuditi rješenja vezana za turizam, sport, poljoprivredu i IT sektor jer smatram da su to ogromni, još uvijek neiskorišteni potencijali od kojih nam svima može biti mnogo bolje. Naša stranka ima pripremljen set mjera i za ostale sektore koje ćemo implementirati kako bi zadržali našu mladost. Na tu mladost sam najviše ponosan, bili su jako otvoreni, pisali mi (samo jednu od poruka izdvajam ovdje kao ilustraciju), davali prijedloge, u njima sam primjetio ne samo talenat nego i veliku želju da zajedno ovu zemlju učinimo boljom, Posebna je obaveza i zadaća prema njima jer moramo učiniti sve da ih ovdje zadržimo. **Sutra** je pred nama velika prilika. Uzmite olovku u ruke i pokažite vašu moć: Glasajte kako bismo utišali bidone na banicima, tj. galamdžije i huškače, nasilnike, profitere. Glasajte kako bismo ulagali u pamet, znanje, nauku i tehnologiju, za one koji su tihi ali mogu napraviti revoluciju. Tiha većina odlučuje **sutra!** ”

Imajući u vidu tekst sporne objave u kojem se navode riječi „**Sutra** je pred nama velika prilika. Uzmite olovku u ruke i pokažite vašu moć. Tiha većina odlučuje **sutra!**“, potpuno je jasno da je sporna objava objavljena u vrijeme trajanja izborne šutnje odnosno 24 h prije otvaranja biračkih mjesta tj. u periodu kada je zabranjeno vođenje izborne kampanje i javno oglašavanje. Sporna objava u svom opisu i sadržaju pokazuje promociju programa političke stranke Naša stranka i Amela Lizde kandidata te političke stranke, s ciljem informisanja i uticaja na birače pozivajući ih da

izađu na izbore i upoznavajući javnosti o proteklim i budućim aktivnostima, a sve u periodu kada je zabranjeno vođenje izborne kampanje i javno oglašavanje kršeći na taj način odredbu člana 7.4 stav (1) tačka 3) Izbornog zakona Bosne i Hercegovine.

Odredbom člana 7.4 stav (1) tačka 3) Izbornog zakona BiH je propisano da u periodu koji počinje 24 sata prije otvaranja biračkih mjesta i traje do njihovog zatvaranja, političkim strankama, koalicijama, listama nezavisnih kandidata i nezavisnim kandidatima i kandidatima na listama pripadnika nacionalnih manjina zabranjeno je učešće u javnim političkim aktivnostima što uključuje, ali se ne ograničava između ostalog samo na sljedeće: **korištenje domaćih i međunarodnih sredstava komunikacije s ciljem uticaja na birače.**

Uvidom u kompletan spis predmeta i raspoložive dokaze, ovo vijeće zaključuje da je Centralna izborna komisija Bosne i Hercegovine je pravilno utvrdila da su politička stranka Naša stranka i kandidat ove političke stranke Amel Lizde. odgovorni za kršenje odredbe člana 7.4 stav (1) tačka 3) Izbornog zakona Bosne i Hercegovine, jer je Amel Lizde na svom Facebook profilu vodio izbornu kampanju u vrijeme trajanja izborne šutnje, tj. u vrijeme kada je zabranjeno vođenje izborne kampanje i javno oglašavanje, odnosno objavom teksta od 01.10.2022. godine na Facebook profilu izvršio promociju sebe kao kandidata i političke stranke kojoj pripada u vrijeme trajanja izborne šutnje, čime je prekršio pravila ponašanja u periodu koji počinje 24 sata prije otvaranja biračkih mjesta i traje do njihovog zatvaranja. Iz tog razloga neosnovan je navod podnositelja žalbe da inicijativa za pokretanje postupka u smislu člana 6.2 stav (2) Izbornog zakona BiH ne sadrži osnovni podatak za pokretanje postupka jer ih samog tekst sporne objave proizilazi da je povreda učinjena u vrijeme trajanja izborne šutnje, odnosno u vrijeme kad je zabranjeno vođenje izborne kampanje i javno oglašavanje.

Samu visinu izrečene kazne ovo vijeće nije preispitalo, iz razloga što odluka u ovom dijelu nije bila ni pobijana žalbom.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

PREDSJEDNIK VIJEĆA
S U D I J A

Zvezdana Antonović